


НАРКЕСКЕН

1 2010
21593к



Несінбек
ДЭУТАЕВ



МІНЕЗ

Екінші
том

1 2010/21593 к

Несілбек Дәутаев

Мінез


НІҢДІСІЛБЕК ДАУТАЕВ НАТОЛАСАЖ
Адсандаулат і мемлекеттік мүштегі

Екінші том



УДК 821.512.122 – 3 ✓
ББК 84 Қаз
Д 22

ҚАЗАҚСТАН РЕСПУБЛИКАСЫ
МӘДЕНИЕТ ЖӘНЕ АҚПАРАТ МИНИСТРЛІГІ
АҚПАРАТ ЖӘНЕ МҰРАФАТ КОМИТЕТІНІҢ БАҒДАРЛАМАСЫ
БОЙЫНША ШЫҒАРЫЛЫП ОТЫР



Дәутаев Н.
Д 22 *Мінез. Екі томдық таңдамалы шығармалары.* — Алматы: «Ан Арыс» баспасы, 2009. Т.2. — 336 б.

ISBN 978-601-7130-27-5

Қазіргі қазақ прозасында өзінің айқын қолтаңбасымен көрініп жүрген талантты жазушы Несілбек Дәутаевтың таңдамалы шығармаларының 2-томына топтастырылған әңгіме-хикаяттары өміршешендік өрісімен, бітімі бөлек жаратылсы, таза көркемдік қуатымен ерекшеленеді. Жазушының үлкен әдебиет айдынына желкенін еркін жайған батыл ізденістері ұлттық бояуы қанық баяндау үлгісі, өзге де даралық сипаттары соның дәлелі.

Тағдырлы кейіпкерлердің көркем сомдалуы бүгінгі өмір, қоғам, замана ақиқатын тануға көмектеседі. «Мінез» деп аталатын бұл кітапқа енген көркем дүниелер рухани жан әлемімізді кесір-кесалаттан, азып-тозудан, бейғам-бейдауалықтан арашалауды мақсат еткен шынайылығымен құнды.


Д 4702250201
00(05)-09

ISBN 978-601-7130-27-5

УДК 821.512.122 ББК 84 Қаз

© Дәутаев Несілбек, 2009
© «Ан Арыс» баспасы, 2009

Хикаяттар



Жол

I

Маусымның алғашқы сенбісінде байырғы жолшы Төлеп карт төсекте тілсіз жатты...

II

Сәукеленіп көрінетін аскар ар жағынан қызығалдақтың реңі түстес ал қызыл әсем шұғыла көтеріліп келеді. Осыдан былай қарай Баянды тауының көркін тілмен айтып жеткізе алмайсың. Күннің бір шекесі көкжиектен қылтиып көрінгеннен беткейдегі түсі қанық көкпенбек майда бетеге, жылға-жылғадан бытысып өскен ұлпа құрак мың бұралып қоя береді-ау. Оқшау-оқшау сенгірлер қандай маңғаз, аяқ ұшы тисе сузып кететін тас қорымында алтын шуақ аунап-қунайды. Ақ түбіт бұлттар аспан жүзінен сырғанап түсіп, жұлдызды әлемді, арда емген шоқыларды құшады. Шілденің кенезе кептірген қырық күнінде Баянды тауының басында құнара ақ нөсер желіп өтетіні сондықтан. Қызық қой бұл. Таудың да мәуелеп шалғынға бөленіп, жайнап, жасарып тұруға деген құштарлығы ерекше.

Аңырақай даласының көркі де, биігі де Баянды тауы. Оны батыс пен шығыс әйгілі асу ретінде біледі. Сонау күн шыққан көкжиектен бермен қарай ширатылып жатқан қара жол күнгейге қаратса осы асудың құлы-құлы аңғарлары мен өрьлдиң куалап барып асады. Асудың екі жағы жиырма екі километрге созылып жатыр. Теріскейін Ешкілінің, күнгейін Қызылтастың жолшылары қарайды.

Шағын жол пайдалану пунктінің қыбыр-жыбыры мана-ақ басталған. Айналасы бес үйдің уақ малы ана ауладан да, мына ауладан да шығып, беткей-беткейдің баурайымен жайылып барады. Жолшы Имансерік ескі «Беларусьтің»

моторына үніліп, өзімен өзі әлек. Енді аздан кейін тракторын тырылдатып, Әтейді жанына отырғызып, асуға бет алады.

Имансерікті білетіндер жолдан өзгемен ісі жок деседі. Айтатындары рас. Отызжылдан астам оның өмірі осы Баянды тауының бауырында өтіп келеді. Анада-мынада шаруасы болмайды, төменгі колхоздағы ағайындарымен араласуға да қолы тие бермейді. Жазы-қысы білетіні – жол, соның кеткен жерін бүтіндейді, қисайғанын түзейді, не керек, шаруа қыруар.

Тапжылмай бір жерде ұзак жылдар істегендердің көвшілігі кеуде сокқылап жатады ғой. Имансеріктің жөні басқа. Өзің қозғау салып, тұртпектемесен, тындырған жұмысы жайлыштіс жармайды. Егер оның күш қуаты тағы бір жүз жылға жететін болса, мына қалпынан айнымай шаба берер еді. Бірақ өмір, шіркін, ондай кеншілікті қашан, кімге жасап еді.

Жайшылықта томаға-түйік жүретін адамның құлағына жол туады сөз тисе, көсем де, шешен де – сол; Төлеп секілді байырғы жолшының өмірбаянынан талай түндерге сырнама шертіп бере алады.

Жанына аттап-бұттал Әтей келді. Жігіттің айтатыны белгілі:

- Имеке, темекі бермейсіз бе?
- Осы сен қалтаңа неге салып тартпайсың?

Анау басқа сөз айтпастан уақ малын жинақтап тастан, құртақандай магазиннің құлпына үніліп тұрған сатушы Тоқмолдаға қарай аяндады. Ол арсы-гұрсі алаңғасарлау жігіт өзі. Өткен жылды Қайрактының кеніне кетіп, екі айға жетпей қайтып келіп тұр. Кенде істеу бұған қол емес көрінеді. Екі ісінің бірі жоспар, жоспар деп күндіз күлкі, түнде үйқы көрмейді екен. Жиналыстан жиналыс.

Сатушы екеуі шылымның тұтінін будактатып едәуір тұрды. Бұлардікі белгілі әңгіме. Карадан-қарап жоқтан өзгеге дауласып жатады. Әтей сатушыны әдейі ерегістіреді. Өйткені, ол қызба. Қоштамай қойсан өзінікін күні бойы дәлелдеуге бар.

Әтей мен Тоқмолда өзара әлденеге айтыса-айтыса келіп, Имансерікке қол берді.

– Имеке, сіз мынаған құдайшылығынызды айтыңыз, – деді Тоқмолда. – Біз соғысқа қатысқан адамдармыз, мысалы.

– Соғысқа менің жасым ілікпей қалмады ма, – деп Имансерік дәп өзі кінәлідей қызарып кетті. – Мен отызыншы жылғымын ғой...

— Солай ма еді өзі? — «Япыр-ай, менің жанымда бала екенсің ғой» дегендей Тоқмолда ананың бас-аяғына қарап біраз тұрды да, — Қатар шығармыз деп журмедім бе, — деп Этейге бұрылды. Фронтовиктердің ішінде жалғыз мен екем, бала. Сен жаңағыдай қия тартқаныңды қой.

Жігіт естімеген адамдай айдалаға қарап, ұзак есінеді.

— Ұйқым қанбайды ылғи.

— Ес жоқ қой сенде.

— Содан артық бірденеңіз болса берсеңізші.

— Жасы үлкенді ақымақ еткен соң, не күтеміз бұлардан,

— деп Тоқмолда пәсейіп қалды.

— Менікі қалжың ғой, Тока, — деді Этей құліп. — Сізben ойнап қара басты дейсіз бе.

— Е, сөйтсенші... — Тоқмолда елпендең разы болып, сосын қалтасынан қымбат шылымының қорабын шығарып, алдымен Этейге ұсынды. — Шылым тартайық, — деді.

Кезінде әрдайым осылай кісінің көнілін тап бассаңшы деген сөule бар.

Имансерік ескі шүберекке қолын сұрткіштеп байырғы жолшының үйіне көз қырын салды.

— Төкен құрт нашарлады ғой, — деді сосын жағалай қарап.

— Жас келген соң қайтеді, — деп Тоқмолда күрсінді.

Әтей трактордың дөңгелегіне сүйеніп тұрып күнк етті:

— Осы кісінің баласы бар деуші ме еді...

— Болған, — деді Имансерік. — Болған...

— Болғаны қалай?

Имансерік темекінің талын ұзак шиratты.

Төлеп қарт... Қым-қиғаш өмірбаяны бар Ешкілінің ең байырғы жолшысы. Ол туралы жұрт айтатын әңгімелер де әр түрлі. «Кезінде екі иығын жұлып жеп Аңырақай даласын дүркіретіп шықпады ма. Әкесі Еркебайдың ұзында кеткен кегін, қыскада қалған өшін қайтарды. Кейін көресіні көрді ғой өзі... Ақ қар, көк мұзда жол салды, ғұмыры соның тілеуін тілеумен өтті, жолаушының қолтығынан демеді, уһ деген жоқ. Соңшалық итжанды бола ма адам?..» «Оның басындағы қайғыны дұшпаныңа бермесін. Оның басындағы қайғы адамзатты әрі-сәрі ететін шер...» Тағысын, тағылар. Адам тағдырының осыншама қат-қат болатынын кім білген.

— Төкене кіріп шығалық, — десті бәрі. — Кешке дейін қу тірлікпен кетеміз ғой алды-алдымызға.

— Шаруаға ертерек кіріспесек, тұс өuletінде мына күн балқытып жіберер, — деді Әтей. — Шекеміздің шылқып жүргені шамалы, күн тисе төбем солқылдаш шыға келеді.

Шығыстан алаулаған дәп-дәңгелек күн әжептәуір көтеріліпті; қызыл жалқын дүниені түгел арда емген; Баяндының асқаралы шоқыларының басына жаңа әзірде үйірілген сары ала нұр енді етекке қарай емініп, бұта жапырақтарындағы тұнгі дымның аңқыған жұпарын жалап-жасқап барады; күн нұрының тарқатылып кеткен алтын бұрымдары зенгір көктің бір бүйірінен осындай туғалы әлсін-әлсін төбе көрсетіп тұратын үй орнындағы қара бұлтқа ғана жетпей жатқан сияқты. Қазір жер мен аспанның сәл кіrbіні сол, әсем дүниенің бір жақ бет ұшындағы айыл жимастан түйіліп қалған.

Жолшылар Төлеп қарттың үйіне қарай бетtedі.

* * *

Қарт екі көзін шарт жұмып, сұлқ жатыр. Қыртыс-қыртыс мандаудына коңыр көленке ұялаған аппак қудай селдір шашының арасынан қып-қызыл құйқасы айқын көрінеді, екі ұрты суалып, шықшықтары шығып кетіпті. Имансерік байырғы жолшының қолын сипады.

— Төке... — даусындағы қамыққан, босап, іштей егілген сарынды өзгелері түгел аңғарды.

Қарт аппак кірпігін едәуір кідіріп барып көтерді. Әуелі ол терезеден жарық дүниеге көз салды. Бұл шамада күн сәулесі топыраққа сіңіп, беткейлердің қалың бетегесі құлпыра бастаған. Байырғы жолшы тамсанған сыңай білдірді, терең шыңыраудан семіп көрінген, екі көзінде әлдене жылдысты, саусақтарының ұшы жыбырлап, ақ жайманың шалғайын түрте берген. Әйтсе де тырс деп дыбыс шығармады. Айтары: «Тағы таң атып, күн шықты ма. Қарандаршы әне... Шіркін-ай, десенші. Шіркін-ай, өмірдің өлмейтіні қандай жақсы еді. Біз қаракетті іріткенмен, таң атуын, күн шығуын қоймайды. Бекер, бекер жүдейсіндер, сыртқа көзсалып, қуанындар, кәне, сендер қуансандар маған да женіл болады, шаттыққа толы жүздерінді көріп жатсам, өзгедей тілегім жок, сеніндер...»

— Төке, қалайсыз? — деді Имансерік.

Байырғы жолшының көзіндегі ақ шенбер тарыла түсті... Адам кең дүниеге келгендері, кетеріндегі пейілдерің-ай! Барлық сүмдышымыз сол екі арада ғой. Нардай жақсылықты

қылдай қиянатқа қып жіберетін пенделігіміз... Ақ ниеттің қайсыбір кезде алтын масак қауызының ішінен дән орнына тас теріп қалатыны... Барлығы жолдың басы мен аяғына дейінгі аралықта. Неге? Білмеймін. Сендер де білмейсіңдер, ешкім білмейді...

Уақытының көбісін осы үйде өткізіп жүрген Имансеріктің әйелі жолшылардың алдына бір-бір кесе ыстық шай қойды.

Дастархан шетіне тізе бүккен соң сатушы күтпеген әңгіме бастады.

— Қайрақтының кенін кеңейтеді деседі, ол не сөз? — деді Тоқмолда. — Күзге қаратып тұр ма?

— Кен тасу үшін Үшарал станциясына поезден екі жұз КамАЗ жеткізілген көрінеді, ар жағын көре жатармыз да.

— Бізге жаңа трактор бермей ме онда? Жоқ, әлде биыл да көреміз бе көресіні? — деп Этей Имансерікке қарады.

— Пірәлинге айтқам.

— Тағы айтыңыз, пәлен-түген дейтін болса барымды киіп, артығымды бәктеріп, қара суық түспей тұрғанда төменгі колхозға көшем.

— Алдымен құм жағы қын болып тұр, — деді Имансерік,

— Этейдің қоқан-лоқы мінезіне еті өліп кеткендіктен оған мұлде көңіл аудармай. — Құмқазғанның бетін енді бірекі қалқып алсақ, ар жағынан сары топырағы бұрқырап шығады. Етектегі колхоз бар. Үшаралдың жұрты қосылып, жан-жағынан қол салған соң қойсын ба.

— Өзімізден қырышық тас шығаратын диірмен болса табыс көп түсер еді, — деп Тоқмолда жөткірінді. — Мұның өзі игілікті іс болғалы тұр ғой, түбінде.

— Сіз пенсияға қашан шығатын едіңіз? — деді Этей бұра тартып.

Тоқмолда жігітке ұнатпай қараған.

— Эй, шырағым, — деді көзі ежірейіп, — әлгі қарыздарынды төлеңдерші, келінге айтсам үн демейді.

Этей ананың сөзін естімеген адамша Имансерікке қарап:

— Төкенді ауруханаға жеткізу керек, — деді.

Анау қабағын шытынды:

— Ары-бері сүйремендер, жолға қарап жатып жұмайын көзімді деген өтініші бар, — деп қарттың жүзіне қайта үнілді.

— Оның үстіне кәрілікті жеңетін күш әзір жер бетінде жок қой. Жетпіс тоғыз оңай ма...

Осы жасқа келгенше қарт шаруа басында жүріп еді. Азын-аулақ пенсиясын малданып жамbastap жататын-ак жөні

бартуғын, өйтпеді. Тірнектеп жолдың тасын терді. Неге? Бұл сауалға оның өзінен басқа ешкім жауап бере алмайды. Ана бір жылдары тәменгі колхоздан жалғыз аттық арбамен теспе жолдың шаңын бүркүратып бөріктері қоқайған үш шалдың келгені бар. Айтатындары рас та. «Өмір бар жерде қаза бар. Жасың болса мынау, біраяғың төрде, біраяғың көрде, баяғыда осы Ешкіліге әкем Еркебай бекет салдырған екен деп елден жырак жол жағалап жүре бересің бе өлгенше? Өзгені қайдам, Ешкілі де, құдай да разы саған. Асуына жол салдың, сақал-шашиңағарғаншажиегін бүтіндедін, ендігі шаруаны өздеріне қалдыр. Басқасын қойғанда көйлек-дамбалынды қашанғы өзіңжуасың. Баянды әулетінентараганшаңырактыңтаңдаған біреуі сенікі, көзің жұмылғанша бағып-қағады. Кісі қолына қарамаймын десен, өз алдыңа үй етеміз. Ауылдағы соқа бас кемпірлердің бірі шайыңды қайнатып тегі береді. Көш.»

Төлеп қарт үндемеді. Ерте төлдеген қара кепенің басын қонақтарының алдына көлденең тартып қойып, тымтырыс отырып алды. Шалдар жағы: «Өлімнен кім қашып құтылған, талқаның таусылған күні иман айтып, беретін ел ортасынан тыскары айдалада қалғанымыз кейінгілердің сүйегіне таңба. Парызымыз үрім-бұтактың абыройы екен, бойдан қуат кеткенде соны ойлайық. Ары-бері өткен машиналардың гүріл-тырылынан үйқың қашып, «япыр-ау, ағайын, қайдалап» жол бойында сен жатсан, «бауырымызды ортамызға көшіріп әкелмей бізді неден қара басты» десіп, ана жақта ел жатады. Ат-арбамен сүйегімізді салдыратып мына келісіміздің жөні солай, айтқанға көнсен баланың бірі келіп көшіріп әкетеді», – десті.

Үш шал қанша тігісін жатқызғанымен, байырғы жолшы тіс жармай қойған, ескі бөстекке жантайып жатып алды. Мұлде ештеңе естімейтін меніреу сияқты.

Келгендер шала бұлінді. «Біздің жақжаппай отырғанымыз не, сенің шытыр жеген қойдай дөңбекшігенің не? Жолдан басқа да дүниенің бар екенінен бейхабарсың-ау, зәді. Кешелі бері бірімізді-біріміз демеп, әлмисақтан келе жатқан атабабаның сөзін айтамыз кеп... Құлағың бітіп қалмаса жеткен шығар жетене. Сондағымыз әнен-мінелеп қалған шағында елдің ортасында болсын деген ниетіміз. Дәуреніңнің барында дара шаптың, шылауыңнан алсақ көкте құдай бар, енді бүгін бөрігіміз қисайып балалардың көз алдында тізе қағысып отырсақ қандай жарасады. Бәрекелде...»

Жоқ Төлеп карт ағайындарын ләм деместен шығарып салды. Теспе жолдың шаңын бүркүратып бара жатқан жалғыз аттық арбаның соңынан ұзак қарап тұрған.

Отырғандар байырғы жолшының көзіндегі дөңгелек ақ шеңбердің ортасындағы қараышықтан жылт еткен сәулені аңғарды. Сыңайы қарттың жанарына жан кірді. Бұл талмаурай бастаған күш-куаттың ілкіде ес жиған нышанытұғын. Негізі қайратты адам алқымнан алған ажалға оңай берілетін көрінбейтін. Жолшылар елеңдеп қартқа ұмсына берген.

— Шаруа!.. — деп барып Төлеп қарт сөзінің артын жұтып койды. Шамасының жеткені сол болса керек.

Байырғы жолшының көкейіндегісін бәрі түсінген. Таң атқалы қашан, бұрауын күткен шаруа бар, маған қарайлай бермей жөнендер деп жатыр. Сұңғыла қарт жұмыс басты жұрттың енді қазір қалай шығып кетудің есебін таппай отырған көңіл жықпас халін айналтпай ұқты.

— Біз жүрейік, — деді Имансерік. — Тоқа, келіп-кетіп тұрарсыз қарттың жанына.

— Бұгін ауданға, отчетке баратын едім, — деді сатушы күмілжіп. — Жеделдетіп орала қойсам жақсы. Осы айдың жоспары орындалмайын деп тұрған жоқ па? Райпоның бастығы көрген жерден жағадан алады.

Трактор ырғалып жолға тұсті. Жолшылар асу дағы екі қауіпті жердің біреуін бітіріп, екіншісіне тас төсеп, жар жақ ернеулеріне шынжырмен белдеулер тартып жатқан.

Жол бойының дүрмегіне араласқан баяғы күннен бері Имансеріктің пайымдауынша, мына онды-солды зымырап бара жатқан қуатты қозғалыс діттеген жеріне қол-аяғы суымай, қабағы ашық жетсе, бұлардың топ жарып алған бәйгесі де сол.

Имансеріктің ағынан жарылып айтары — адамдарды келешекке лек-легімен өткізіп тұрған Баянды асуы — киелі, құдіретті жол. Сіздер оны, бәлкім, көрген жоқсыздар. Жер бетінде мұндай жолы қын асу, сірә, некен-саяқ. Сонау, сонау шалғайдағы солтүстіктен астық тасуға көмекке келген жүргізушілер тізбегі асуға шығып, құлдилар тұска келгенде, жүректері дауаламай, кері қайтып кетіпті деген де қауесет айтылды. Ол жаздың күні ғой ал енді қыста қайтер еді?

Жолшылар үшін қым-қуыт қаракет қыста күннен тұнге, түннен күнге ұласып жатады. Тәулік бойы көк тайғанак

ұстіне құм төсеуден де қолың босай қойса, кәнеки. Отызға енді аяқ басқан кешегі Әділет сол жүргінші жолын ақ қар, көк мұздан тазартып жатып мерт болмады ма. Асу бойындағы құрбандық жалғыз сол деймісің?

Көк «Беларусь» қара тұтінді будактатып келеді. Жана «Түйе табаннан» өтті, әнеки, ана беткейде «Ителгі» қалды, одан соң... Не көп – жол бойында атау көп. Бұлар жұмыс істеп жатқан тұста «Шерлітас» бар. Әрқайсысы өз алдына ертегі, өз алдына азыз. Осы азыздар ішінде жолшылар көкейінде көлдененен тұрып алатын «Баянды тау» шежіресі. Оны кейде «Шерлі тас туралы мұң-нала» деп те атайды... Жұрт айтатын «Баянды тау» шежіресі немесе «Шерлі тас туралы мұң-нала» хикаясы былай өрілер еді...

...Онда да күн қызырып шығып, қызырып батыпты. Мына шетсіз-шексіз құба дүние аласапыран асау күндерді белден басып, дүрия көйлектің етегіндегі дөңгеленіп жатқан. Айнала кең жазық. Ана жер, мына жерден шұбаландаған көкшіл тұтіндер жазы-қысы Аңырақай даласының ұстінде күн ұзын сейілмей тұрып алады. Тай-құнан мінген балалар ауылдан ауылға шапқылап:

*«Қара жер мен аспанның
Күпиясын ашқан кім?
Асқар тауды басқан кім?»*

«Асқар таудан асқан кім?»— десіп әндете жөнелгенде, қырда малшы, етекте егінші ойға кетіп, жан баласына асу бермеген ұлы тауға телмірген. Сондағылары тәбесі көкке енді-енді тимей тұрған таудың ар жағын бір көруді армандалты. Таудың ар жағынан Күннің сүттей ұйыған тынық кезінде еміс-еміс жетіп тұратын адам үні күндіз көкейлерін тесіп, тұнде тұстеріне кірген. Қару-жарактарын сайлап, тұлпар мініп сапарға шыққан талайлардың қанқаларын қар суы ағызып әкеліп тастайтын. Күндер өтеді, жылдар өтеді. Ұрпақтан ұрпақ өрбіген сайын Аңырақай жұртының көкейіне таудан қайткенде де асу арманы ұялай беріпті. Амал не, сапарға шыққандардың сүйектерін қар суы ағызып әкеліп тастай береді. Бірақ адам қашан да өлермен. Адам өлімнен емес, өзегін өртеген көкейтесті арманына жете алмаудан қорқады.

Бұл сөздің иесі — Жаңғырық әулие еді. Оның Баянды және Шер деген екі ұлы болыпты. Екеуі де батыр, сұлу, бүкіл Аңырақай таң қалатын өрім жастар екен. Күндердің күнінде Жаңғырық әулие тұс көреді. Тұсінде сақалы белауырынан тұскен қария қолындағы асасын көкке көтеріп:

— Эй, Жаңғырық әулие, аспанға қара! — депті. — Не көріп тұрсың?

— Айды көріп тұрмын, Құнді көріп тұрмын, — Күн мен Айдың қатар тұрғанына Жаңғырық әулие жаман таңырқайды.

— Ай мен Күн жоғалса, дүниенің жайы қалай болады? — дейді ақсақалды қария.

— Қара тұнек басады.

— Ендеше, екі ұлынды неге қауіпті сапарға дайындаپ жүрсің?

— Ұлытауға жол салмай бола ма, қария?

— Күннің шығысы мен батысын жалғайтын дәнекер керек.

— Бәрекелде, оның ақыры азап-шер екенін білемісің?

— Адам өмірі сол азап-шерден тұрады, қария.

— Сонымен ойынан қайтпаймысың?

Жаңғырық әулие басын шайқады.

— Ендеше, бердім тілегінді, — депті анау. — Ұлытаудың ұшар биігінде жақпар жартас бар, оның басында көзінен үздіксіз жас ағып тұратын қарғыс атқан қаракұс отыр. Құстың солай отырғанына талай замандар өтті. Оның күткені — адам. Адаммен тілге келсе ғана ұшып кетеді. Алайда қоятын екі шарты бар. Сенің екі баланды мен сол күсқа аман жеткізем. Одан арғысы балаларыңың қандай сұт емгеніне байланысты, адал екен — арманыңа жетесің, арам екен — бүкіл әулетіңе азап-шер... Осыны ұмытпа! Балаларыңа айт, екеуі бір тілекпен барсын.

Жаңғырық әулие ояна келсе, көкжиектен күн дөп-дөңгелек болып шығып келеді екен, қотаннан енді өре берген мальдың ішінен боз қойды ұстасып ауылдың дуалы ауыздарынан бата сұрайды. Аңырақай айдаласында бір күн, бір тұн той болады. Жастар алтыбақан құрып, Баянды мен Шерді ортаға алып, таң атқанша ән салады. Жаңғырық әулие тау сағасында отырып жыр толғайды.

«Қос қарағымды көк тікен, шөңге, балақтан алма!

Қос қарағымды алқымдап, боран, тамактан алма!

Қос қарағымды қара бұлт, қамап, қанаттан алма!

Қос қарағымды жебей жур өзің жаратқан, алла!»

Баянды мен Шер тау беткейлерді қиялап ұзак жүреді. Бір кезде ат-тұяғы күртік-күртік қар мен сірескен көк мұзғатиеді. Мұндай азапты олар еш уақытта көрген жок еді, аттар

көшкінге құлап өздері жаяу қалады. Мұзды тауға тырмысқан батырлардың көбелері сөгіліп, башпайларын үсік шалады. Бірақ олар ілгерілеуін тоқтатқан жок, тістерімен қар тістеп алға жылжи береді. Ақыры, мұз таудың да үстіне шықты-ау! Төмен қараса, Аңрахай даласы оймактай ғана болып жатыр екен. Алда төбесі көрінбейтін биіктегі мұнартады.

— Құрысын, қайтайық, — депті Шер. — Біз жете алмаймыз.

— Жетеміз, — дейді Баянды. — Мұз тауға шыққан адам қалай жетпейді. Қане, маған сүйен...

Енді екі батырды алапат боран қарсы алады. Қарға адым жер көрінбейді. Дүние астан-кестен. Қар аралас тас қиыршықтар басы-көзге сабалап әбден діңкелетеді. Екі жігіт боранмен әңгелек ойнаған қой тастардың арасымен өрге қарай тарта береді. Қас-кірпіктеріне сауыс-сауыс мұз қатады. Сауыттары тарқатылып, жалаңаш денелерін сұық жел сабалайды. Екі ер өлдім-талдым дегенде Боран таудан аман шығады-ау, әйтеуір. Арттарына қараса Аңрахай даласы мұлде көрінбей қалыпты.

— Аға, қайтайық, — дейді Шер тағы да. — Кеудемізде жанымыз барда қайтайық.

— Қайтпаймыз, — депті Баянды. — Мұз тау, Боран таудан өткен адам қайтпайды. Көне, қолыңды бер!

Олар қап-қара тұманға кіріп кетеді. Алдары тіп-тік қия беткейлер, шыңырауына көз жетпейтін құзарлар. Аяғың сөл тайса-мәңгі келмеске кеткенің. Тұнектен екі батырдың көздері мұлде көрмей қалады, тек бағдарлап қана жылжиды. Бұл бір жан баласы естіп-білмеген азап еді. Қия жартастарға жабысып әзер ілбіген екі батыр осылай қанша азаптанды, білмейді, бәлкім, апта өтті, бәлкім ай өтті, әйтеуір, өлдікталдық дегенде Тұман таудан шығады-ау. Арттарына қараса, қат-қат мұнарлардан өзге көздеріне еш нәрсе түспейді.

— Енді бұдан әрі жүре алмаймын, — дейді Шер. Әшейінде жарқылдалаң тұратын жанарлары өлеусіреп сөне бастағандай болып көрінеді. — Мені тастап кет, аға.

— Шыда, — дейді Баянды інісін жұбатып. — Қындықтың көбі кетіп, азы қалғанда, шыда, бауырым.

— Осы азаптың бізге керегіне, соншалықты азапқа салатын әкемізге не жаздық? — Шердің даусы ызғарлы. — Жазығымыз қандай.

Баянды інісінің жүзіне таңырқай көз тастайды.

— Мұның не? Бұл қай сөзің? Бізді сапарға жетелеген мұрат емес пе?

Олар осылай айтысып жатқанда, сақалы белуарына түсекен қарт ғайыптан пайда болады.

— Түрегеліндер, — дейді ол асасын көкке білеп. — Енді азғантай ғана жол қалды, сәл шыдаған адамға үйқыдағы құсқол созым. Тек естерінде болсын, оған екеуің бір тілекпен барыңдар... Ал, беттеріңнен жарылқасын!

Бұл Жаңғырық әулиеге түсінде аян берген қарт болатын.

Екі батыр талай қындықтардан бірін-бірі жетелеп үйқыдағы қара құсқа жетті, ақыры. Баянды барып құс қанатынан сипайды.

— Сендер кімсіндер? — деп сұрайды үйқысынан шошып, оянған қара құс. — Кімсіндер өздерің?

— Адамбыз, — оған алдымен Баянды жауап береді. Аңрахай даласындағы Жаңғырық әулиенің ұлдарымыз. Біз асуға жол салғалы келдік.

— Солай деңдерші...

— Күншығыс пен Құнбатысты мәңгі бөліп осы тау жатыр, әuletіміздің мұраты — оған сүрлеу салу.

— Адамның мұраты кейде құрбандықты қалайды.

— Біз оны білеміз, — дейді Баянды. — Біз бәрін біліп, бәріне бас тігіп шыққанбыз.

— Екі шарт айтам, — дейді құс Баяндыға қарап. — Оның біріншісі — көкпен тілдескен мына тау аласарып, ақ қар, көк мұзынан арылсын, сөйтіп адамзат Құншығыс пен Құнбатыстың арасына жол салсын десендер, анау көрініп жатқан тозақ отына ойланbastan секіресіндер.

— Екіншісін айтпай-ақ қой, — дейді Баянды батыр. — Элгі айтқандарың орындалса, тозақ отына ойланbastan секіруге дайынбыз! Кеттік, Шер!

Ол осыны айтып, қып-қызыл алауға бір-ақ қарғиды. Бұл кезде Шер бетін басып, еңкілдеп жылап отыр екен. Құстың даусы саңқ етті:

— Дайынбысын?..

— Маған екінші шартынды естіртші, — дейді Шер тізерлеп. — Өтінем сенен.

— Бак-дәulet, сән-салтанат, басыңа тәж.

— Рас айтамысын, қара құс?

— Артыңа қараши.

Шердің көзі бұлдырап есінен адаса бастады. Ол мұндай ғажайыпты өні түгіл түсінде көрмеген. Баспалдағы күмістен

тізілген алтын сарай. Босағасы меруертпен көмкерілген есігі айқара ашылған. Кең бөлменің ортасында дәп-дөңгелек ақ айдын, төнірегінде зерлі так. Әлгі дәп-дөңгелек айдын ортасында бірін-бірі қуалаған уыздай жас арулардың қара мақпал бұрымдары мың бұралады.

— Екінші шартты қабылдасаң, осының бәрі сенікі болады.

— Қабылдадым. — Шер тіпті сол шартты сұрап та жатпады.

— Мен қабылдадым онда.

— Ойлан. Екінші шарт оңай шарт емес.

— Мейлі, мен қабылдадым.

— Ол үшін сен бүкіл үрім-бұтағынан бас тартасын.

— Бәріне әзірмін.

— Экем Жаңғырық әулиенің аты өшсін, мен оның ұлы емеспін деп, үш рет қайтала.

Шердің таңдайы тақылдалап қоя берді.

— Тағы айтшы.

Анау іркілген жок.

Сол кезде қара құс аспанға шырқай ұшып шығып:

— Уай, қош бол, Ұлы тау! Сен өзгелер үшін өзін құрбандық-қашалған Баянды батыр әuletінің игілігіне қалдың. Енді сен Баянды асуысын. Өзің аласарып, ақпаның азайып, ак қарың жұқарып, асуыңа жол түссін.

Бұл кезде қол созым жерде астан-кестені шығып жатқан қара бұлт жел қуғандай түйдек-түйдегімен әлдекайда маңып, аспан айнадай ажарын аша беріпті. Құс енді абдырап тұрған Шердің төбесінен түйіліп келіп: «Бір кезде мен де сендер құсап асуға жол саламын деп шығып, ақыры, осы бак-дәulet сән-салтанатқа қызығып, елімнің қарғысымен дүниені көрмейтін, бірақ бәрін естіп отыратын тірі өлікке айналғанмын. Содан бері қаншама жылдар өтті. Опасыздығым үшін, осындай жаза тарттым». Жерден екенін, көктен екенін күн сайын қайталанатын бір даусы: «Мұнда адамдар келмей қоймайды, сонда екі шарт айтасын, адалының тілегі орындалады, арамына айтарың мынау деп еді». Құс қанатын сілкіп-сілкіп жіберіп, көкке қайқая беріпті де: «Сен енді Адам әuletіне опасыздық жасауды тоқтатқан кезде ғана толық адам қалпыңа келесің, оған дейін басынан басқа жерің түгел тасқа айналады», — деп, өзі де жұдырықтай тасқа айналып әлдекайда домалап кете барады.

Азанда оянған Аңрахай жұрты өз көздеріне өздері сенбей таң-тамаша қалады. Мәңгі мұнар басып жататын ұлы тау үсті

ап-ашық, мұнтаздай таза аспанның аясында шыршалары желкілдеп, бәйшешектері алаулап жаңынды жадыратады. Ұшар басы көрінбейтін құзарлар шеккен; ақ қар, көк мұздың көбесі сөгіліп, сай-саласынан шапқылап бұлактардың тәтті құлқісімен көк дүрілдеп қоя беріпті.

Жұрт жапа-тармағай жерошақ қазады. Ақ түйенің қарны жарылады. Шалдар бөріктегін қоқайтып дөнгелене отырады да, Күнбатысқа қаратың қолдарын жаяды: «Осы қалпынан, осы көркінен тайма, мәңгі-бақи шыршаларың желкілдеп, бұлактарың шапқылап жатсын».

Бұрын-соңды мұндай тойды көрмеген еді жұрт. Ұшықыры жок ми жазыққа бәйге аттары айдалады, шолпысы тобығын қаққан қырмызы қыз-келіншектер, алшаң-алшаң басқан атпал азамат пен бозбалалар жорғасы тайпалған бір-бір сәйгүліктің үстінде қуаныш пен бақыттан бастары айналып, гүлдей жайнайды. Қалың жұрттың ортасында қылыш-қылыш заманның жібін суыртпактап, көкірегі алтың сандық көне көз шежіреші отырады. Адам шіркіннің айтып тауыса алмайтын құдіретін әлмисақтан бері қараған жерден таратып, талдау кесілген көсем қарттар құні кеше төбесін көруге зар еткен Ұлы таудың бүгінгі аласа кейпі адал тілектің бодауына сяды.

Осы кезде әлдекім шежіреші шалдың алдына апылтапыл басқан қара домалак баланы жетелеп әкеп басын иген. Қолында жіп-жіңішке жарты құлаш ала арқан. «Бәрекелде, – деді көсем қарт. – Бәрекелде, деп тұрып алмас кездікпен баланың тұсауын кеседі. Содан соң оның бетін Ұлы тауға қаратып қолтығынан демеді. – Қаз-қаз қарағым, асуға қарай қадам бас. Уай, бетінен жарылқасын, аллуакпар».

Былайғы жұртта мұлде ес қалмаған. Құрескен палуандар, айтысқан ақындар, асқақтата ән салған әншілер, етке тойған ертекшілер өзге дүниенің бәрін ұмытып қуаныш тойын армансыз тойлайды. Үлкен-кіші Баянды мен Шерді ұмытып та кетеді. Олар араларында кімнің бар, кімнің жоғымен ісі болған жок. Тек тойдың үшінші құні дегенде барып бөріктегі қоқайған шалдар Жаңғырық әулиені іздейді. «Уа, жұрт, әулие қайда?»

Баяндының жұрт көксеген мұрат үшін тозақ отына түсіп, Шердің тасқа айналғанын түсінде көрген Жаңғырық әулие жанбаласына сездірмей таң әлетінде тауғабеттүзеген. Ол жапжана сүрлеу тауып алады. Танып келеді, сүрлеу Баянды батыр

мінген тұлпар тұяғының ізі. Жүре-жүре Жаңғырық әулие асудың талай кезеңдерінен өтіп, намаздыгер-намазшамда алды құлама биік, екі қапталы қой тасты жоталарға ұласып дөңгелене қалған терен қолатқа жеткенде, көз алдында тұрған сұмдықтан есі шыққаны соншалық, дәрмені құрып, талықси берген. Оның қарсы алдында басынан басқа жағы тас болып қатып қалған кіші ұлы – Шер тұрды. Әулиенің сақал-щаңы әп-сәтте аппақ қудай болып ұлгерген. Ұлына қараған сайын тісі-тісіне тимейді. О, тәнірі! Баласының басы қалтаңдал, шатынаған көзі не жерге, не көкке емес, айдалаға қарайды. Жүзін өлімнің көленкесі торлаған.

Ұзак өмірінде талай сұмдықты көрген әулие мына пәлекеттен жаман шошынады.

– Естимісіңдер, – депті Жаңғырық, әулие тәбесін тоқпақтап, – естимісіңдер!.. Япыр-ау, тіл қатсандаршы! Жапан дала, бедірейіп жатамысың осылай. Асқар тау, сен неге мызғымайсың? Ей, құдіретті жер мен көк, сілкін – үстінде мына менің қарғыс атқан ұлымнан өзге де арамзалар бар болса, аласта!.. Япырма-ау, селт етпей тұра беремісіңдер?! Мынау сұмдықты көзіме көрсеткенше, ал жанымды. Мен өлейін. Мен өлімнен ғана қорқатынмын. Енді мен одан қорықпаймын, жалғыз-ақ тасқа айналған Шерден қорқам. О, жаратылыс, сен жаңылдың! Әділет қайда, ар-ұят қайдасың?!

Қартпен бірге дүние де егіледі. Аспанның түбі түсіп кеткендей қара нөсер шелектеп құйды. Таудың аң-құсы түгел қолатты қоршай тым-тырыс мұлгіп тұрып алды. Қалтаңдаған басқа таңырқап, әрі шошына қарайтын секілді. Жаңғырық әулие мойнынан тәмен қарай тасқа айналған ұлына қолын теріс жаяды:

– О, қарғыс тиген, арамза, дүниенің зәре-құтын алмай түгелдей тас болып қат. Бәле-жалаңның бәрі өзінмен кетсін. Сенің маған сатқындығынды еш уақытта ешкімнің басына бермесін. Сен мәңгі-бақи опасыздықты еске салып, одан өзгені ескертіп тұратын, жан шошырлық, жеркенішті белгі ретінде қал осылай, қарғыс атқан! – деп Жаңғырық әулие дүние кезіп кете барады. Оның зарлаған даусы, айтқан мұн-наласын бір желден соң бір жел күннің шығысы мен батысына іліп әкетіп жатыпты. Әулие сөзін қырда тобылғы, ойда құрак қайталайды.

«Қарайтұғын бетім жоқ дүшпаным мен досыма,

Қайтатұғын бетім жоқ қосағым мен қосыма.

Тілек тіле деп едің, тілегімді бергенің, о жаратқан, осы ма?..»

Осыдан былай қарай адамдар үрім-бұтағынан әлдебір жат мінез көрсе, олардың есіне Шерліасты салатын болған.

Осыдан былай қарай бұл биік Баянды асуы аталған.

Осыдан былай қарай ұлы асудан опасыздыққа қарсы бітіспес күрес жүрген.

Осыдан былай қарай Күннің шығысы мен Батысина сүрлеу түскен...

III

Жолшылар тұс әлетінде барып демалатын. Казір бұлар жұмыс істеп жатқан Шерліастың қарсысындағы бір жағы қожыр тастарға ұласып, бір жағы құлама жарға сүйенген алды қайқаң тар қолтық еді. Әуелі участекіні екі бульдозер келіп, тар қолтықтың тас топырағын жарты ай сүріп, тегістеп таstadtы. Одан бергі жердегі қалған шаруа Ешкілінің жолшыларының еншісінде. Пірәлин бастық істі тезірек аяқтандар, он алтыншы шақырымдағы көпірді бұзып, астына тіреу қоямыз деген соң, бұлар жан аямай кіріскең, енді бір апта мұрсат берсе, тап-түйнактай қылмақ. Дегенмен, соңғы кезде оңай тиіп жүрген жок. Серіктерінің бірінің бұл жер маған қолайсыз екен деп барын киініп, артығын бөктеріп кеткеніне айдаң жүзі. Төлеп қария... Байырғы жолшы жұмысты қиратып кетпеген күнде, істің ығын тауып беріп отыратын ақылшы еді.

— Адам бермей, осылай телім-телім етіп қоятын болса, Имеке, ескертіп қояйын, байлад қоясаныз да тұrmаймын, — деді Әтей.

— Шыда батыр, сабыр етсөңші сәл.

— Маған денсаулығым қымбат, аға.

— Е, батыр-ай, осы асу жолын бір кезде екі жарым мың адам, ақы-пұлсыз, жалғыз тостақ арпа жармасын қара суға былғап ішіп, аш-жалаңаш жүріп салған десем сенемісін.

— Баяғыда біреулер сөйткен екен деп өлмекпіз бе?

— Эй, біреулерің не? — Имансерік шегіп отырған шылымын тастай салды. — Осы жол үшін қаны мен терін сыйып беріп кеткен киелі жарықтықтарды елеусіз атай салғаның не-ай?! Эй, бәтір-ай!..

Имансерік сөйлем отыр: «Адамның жанкештілігіне күмәнданба. Ата-бабаң қыл шылбырмен белін буып асуға аяқ басқанда, қиындықтардың көк шыбықтай солқылдаған қыршын кезінде өзі іздеген. Адам дегенің үшпакқа шығар саңылау тапса – ана сүтімен қан тымырына.

сіңген қасиеті – алған бетінен жан алып, жан беріп жатсын, қайтпайды. Өзің айтшы, қысы ұзак, көктемі кеш шығатын, ақ қар, көк мұзы сірескен асудың өркеш тауларын, құлама жартастарын жалаңаш қолмен бұзып тегістеу кисе киімге, ішсе тамаққа жарымаған жұртқа оңай болды деймісін? Ә, жок, олардың көрер көзге жұпынылығы болмыстың сыртқы алдамшы құбылыс-тұғын: мақсаттың сүйеуі, жебеушісі жан дүниендеңі сарқылмас күш-куат, ертеңіне деген ұшықырысыз мөлдір сенімде еді. Осындай мінез табиғатынан аңқып қоя беретін көнбіс жұрттың қолында кетпен, көзінде нұр ойнаған, батыр! Ат арбаға топырақ артып жатып келер күндердің жұлдызын санапты. Эне, кеменгер халық».

— Ойбай, аға, мұның барлығын несіне айта бересіз?

— Шыққан тегін, ата-бабасының қылған ісін естен шығарған адам онбайды.

— Құдай жоқ қой, ақсақал.

— Эне, әйтпесе! — Имансерік жаман күйінді, — Кісілікті айтып отырған жоқпын ба, саған!

— Имеке-ау, енді... өстесіз.

— Бар болғыр, адамша сөйлессең қайтеді.

— Қазір бәрі өзгерді емес пе, Имеке.

— Адам ше? Адам өзгерді ме? Етектен тартып келген арам ниеттен түгел арылды ма?

Имансерік қолындағы балтасын тастай салды.

Екі көзі Шерліаста. Құдды тікесінен тік сіресіп тұрған адам. Басы, иығы, аяғы – бәрі бар. Оған байланысты азыздың қашан шыққанын, әрине, ешкім айтып бере алмайды, таң қаларлығы – оның өзге ертегілердей ұмытылып қалмайтындығы. Әлде ұлы жолға байланысты, соның бойында тұрған соң ба екен. Әттең, Шерліастың тарихын жұрт түгелдей біле бермейді. Ары-бері өткен жолаушылар оған арнайы тоқтап ұзак-ұзак таңырқай қарасады. Көбісі әлгіге қатарласып, не жалғыз-жалғыз сүйеніп тұрып, кейде балаларына мойның құшактатып суретке түсетін. Тіпті жанына жайғаса отырып, арак-шарап ішетіндер, тамактанатындар да бар. Бұрнағы күні екі мөлдір қара Волга келіп тұра қалды. Әлгіден бірнеше адам шығып Шерліаста беттеген. Бер жағынан аяндал Имансерік те барды. Мөлдір қара Волгалардан түскен бес-алты адамның ортасында тұрпаты бөлек нән біреуі бар, қалғандары соның қабағының ығымен жүретін секілді.

— Мынау ғажап тас қой, — деді нән қара. — Айрықша құбылыс. Ең ұлы суретші — табиғат!

— Рас айтасыз, Сәке, — Жұқалтаң сары мәз болды. — Керемет тегі!

— Табиғаттың мұндай шеберлігіне әрдайым ұқыпты болуымыз керек, жолдастар, қамкорлыққа алу жөнінде нұсқауларың бар ма өзі?

Әлгі жұқалтаң сары қойын дәптерін алғып, қолма-қол бірденелерді жазып алды. Осыны Имансерік бір жерде көрген сияқты. Қай жерде?.. Енді есіне түсті. Өздерінің облыстағы бастығымен бұрнағы жылы ілесе келгені бар.

— Айтқандарыңыздың іске асқандығы жөнінде сізге тікелей өзім хабарлаймын, — деді жұқалтаң сары без-без етіп.

— Керемет, — деді нән қара тасты айнала сипай жүріп.
— Айна қатесіз адам... Кулбаеч көрсе... О, кісі романтик адам ғой.

— Бұл тас туралы біздің өңірдің адамдары таң-қаларлық аныз айтады, — деп соған мактанғысы келгендей Имансерік сөзге араласты.

— Әңгіме аңызда емес, мына таста, — деді нән қара. — Ертегіні қайтеміз, нақты бар, көзіміз көріп тұрған табиғаттың ғажап туындысын аялап, сақтау қажет жолдастар!

— Мен бір жайды білдірейін деп едім, — Имансерік те қояр болмады. Асудың арғы-бергі жұрты мұны Шерлітас деп атайды, — деп аңыздың қысқаша тарихын әңгімелеп берді де, — халық бұған жиіркенішпен қарап, балаларының әлдебір жаман ісін көрсе осы тасты естеріне салады.

— При социализме қандай опасыздық болуы мүмкін, жолдас?

Жұқалтаң сары Имансерікке қуле қарады:

— Мен жұртты аңызға сенеді деп тұрғаным жок, бір кезде әлдебір себептермен пайда болып ұрпактан-ұрпакты жақсылыққа үндел, жамандықтан жирендіретін, адамдар мұлде ұмытып, не әдейі көрмей баражатқан жайларды ескеріп отыруға ықпалы бар ескіден қалған сарынды айттым.

— Сонда сіздің қандай ұсынысыңыз бар? — деді нән қара Имансерікке. — Табиғатты аялап, қорғау принципіне қарсымысыз?

Имансерік сауалды жайына қалдырып жөн сұрады.

— Өзінді танымадық қой, інішек.

— Сәкен біздің министерстводан, — деді жұқалтаң сары жұлып алғандай, сосын «аузына абай бол» дегендей сұқсаусын көкке шашыды. — Жол бойын арнайы қарап келеді.

— Бұл тас біз үшін, — деді Имансерік нән қараға, — опасыздықтың белгісі.

— Сәке, күн шыжғырып барады, жүрелік, — деп бәйек болды, жұқалтаң сары. — Жанағы ескерткендерінді күні ертең қолға аламыз. Бұл өзі бізге дер кезінде берілген ескерту болды.

Мөлдір қара «Волгалар» жүріп кеткен соң Имансеріктің көнілі жұдеп сала берген.

Шерліастың тәбесінде без-без етіп сары шымшық отыр, ұшады, қонады, ұшады, қонады. Құстар тастың мандайына аямай саңғыған-ақ екен.

Жолшылардың үнсіздігі ұзакқа созылды, ала келген түскі астарын қаужасып жым-жырт отыр. Баянды асуының найзатастары дара-дара аңдыздал, әрқайсысы өз шоқтығының биіктігін мактан еткендей бакталасып тұр. Жолдың екі қапталынан тіп-тік көтеріліп кететін өркеш-өркеш жоталардың құнгей беті қожыр-қожыр; кезінде талай сойқанды бастан өткеріп, енді әбден қартайған адамның жүзіндегі бейнеттің ізі іспетті. Соның түбінен тырмысып өрген тобылғылар біріне-бірі қол созым жерден емінеді. Көкпенбек әлемнің айнадай тазалығынан ба, мөлдір ауа жұтынған сайын бойынды сергітіп, көкорайдың жұпарымен еркелете бауырына тартады. Асфальтты жаланғағынмен баса алмайсың, лебінің өзі өн-бойынды өртеп шыдатпайды.

Имансерік пен Әтей жол жиегіне қойған тіркеменің астына кіріп көлеңке сағалаған. Имансеріктің серігі – ой. Бұл жолмен кімдер өтпей жатыр, кімдер?.. Арық атын тепеңдеткен шаруда, тарантасын қоныраулатқан ауқатты да – бұл асудан әрлі-берлі талай асқан. Кейінрек сүрлеу данғыл жолға айналды. Өткел бермес асуыңыз машиналардың табанының астында қалды... Кімдер өтпей жатыр, кімдер?.. Үш жарым мың тұтіні бар Аңрахай елінің азуы алты қарыс болысы Мамыраханның Аманжолы да, Телқозы шынының арқарына дейін өз меншігім деп есептейтін Олжабайдың Мәжібайын тапа-тал түсте қақ мандайдан атып салған большевик Жанпейістің Молдахметі де асқан асу бұл. Анызда Баянды асуудың басында кісілік келеді деп естіген қаймана халық алып қалам десенде, жалтақтамай алдыннан шықпаушы ма еді?! Сөйтіп көрпе

ұзарар, көсеге көгерер, атадан балаға жалғасып келе жатқан адамгершілік бүкіл әулеттің мәңгілік мұрасы болып қалар депті. Бұл ұлы дәстүрдің қаймағын бұзбай сақтап, іңгәлап келе жатқан ұрпаққа аман жеткізу оларға оңай соғып па?! Қабырғанды сөгіп беруге әзір жүрген қасындағы қандасың қаға берісте қақ бастан қамшы сілтер жат қылышқ жағаңдан талай алды да ғой.

Кешегі өзінің туған ағасы Байбосынды неден құдай атып еді?.. Екеуі Ешкілінің сағасында, аралары бес жас, тайқұлындай тебісіп өсті. Келбет десен – келбет, өнер десен – өнер бар еді Байбосында. Ешкілідегі казір жоқ, онда бар Еркебай бекетіне ары өтіп, бері өтіп ат шалдырған жүргіншілердің атын байлаپ, қолына су құйып батасын алатын да, аттандырып жолға салатын да сол-тұғын. Сөйтіп жүріп көзге тұсті. Сөйтіп жүріп зиялды бір адамға ілесіп қалаға кетті. «Оңқай асықтай үйіріліп тұр екенсін, оқы, қол ұшын берейін», – деген әлгі кісі.

Одан соғыс бұрқ етті. Асумен ирелендеп асатын 'арба жолмен Аңрахай даласына тартып, қылышылдаған боздақтары Батысқа шеру тартты. Асу қойнауында қан жылаған халық даусынан күннің көзі тұтылды. Еркек-әйелі, қартымен баласы аралас қалың жұрт асудың үстіне шыққанда, екі айрылды. Ақ жаулықтылар мен қарттар жан-жағын өрт шалған тоғайдай оқшау қалды. Кестелі орамалдарына туған жердің бір шөкім топырағын түйіп алған кіл жайсаң мінген өгіз-арба батысқа қараты жаны шыға сықырлап бара жатты.

Кезек Байбосынға да келді. Әкелері қатал, қайратты кісі еді. Баласымен қоштасып тұрып: «Баяғыда осы жолмен Жонғарға аттанған Жолбарыс жауға ел намысын таптатпай жеңіспен оралып еді, сондай атты күн сендерге туған екен, жан беріп, жан ал, еңсесін енді ғана көтерген елінің көз жасы көкейінде тұрсын жауынды жеңіп қайт! – деп бетін сипаған. – Сосын, қасқыр да жолдасына қас қылмайтынын ұмытпа».

Осы тұсқа келгенде ой жібі тарқатылып Имансерік: «Қайран әке-ай, – деп іштей өкінді. – Сөйткен балаң үмітінді актады ма?!.»

...Сол тұні қара нөсер жауған. Төңіректі қап-қара тұнек басып тұрды. Имансерік әкесіне арқасын беріп, бұйығы жатқан еді, терезенің тықылы анық естілген. Ұйқысы сергек шал басын көтерді.

– Күн жауында жолға шыққан бұ қайсын?

Терезе тықылы су сепкендей басылды. Бұл кезде Имансерік те түрегеліп отырған.

— Сен естідің бе? — деп сұрады әкесі.

— Тықылдатқан секілді.

— Секілді болса, ки андағы шоқайынды, сыртқа шығалык.

Екеудің үйді айналды, тіпті дауыстап та көрді, ешкім жок.

— Төңіректеп жүрген аруақтар шығар, — деді шал. — Элде елес пе?..

Ертесіне әкесі Имансерікті әдеттегідей ерте ояты.

— Эй, бие жоқ орнында.

Алақандай саздауытта үнемі шідерлеулі тұратын қасқа бие ұшты-күйді жок.

— Сен Күркіреудің аузына дейін барып қайтшы, — деген әкесі Имансерікке. — Өмірі ұзамайтын неме тұндегі нөсерде бірденеден үрікті ме, о, несі?

Балакты түріп алғып, сай қуалай жүгірген бала Күркіреуге келіп кіргенде, жалғыз сары ағаштың түбінде байлаулы түрған торы биені көріп, әрі қуанды, әрі таң қалды. «Кім байлап қойған мұны?» Кенет... Кенет оның жүрегі тастағасіне шықты. Аузы түкті, қолында мылтығы бар, саусақ-саусақ пәлекет анадайдан бағжыып тұр. Имансерік тұра қашпақ еді, табаны жерге желімдей жабысып қозғалар болмады, не даусы шықпады.

— Ей, Имансерік, — деді анау мылтығын тастай салып.

— Корыққаның не?.. Бұл мен ғой.

Сонда барып Имансерік ағасын таныды. Бара бас салған. Байбосын мұны қапсыра құшактап алғып, жылап отыр, жылап отыр.

— Бауырым... Жалғызым... Келдім... Енді мен келдім... Немістің әкесінің аузын... Өлсем осы жерде, сендердің жандарында өлем...

— Мұнда неғып отырсын, аға? Үйге келмедің бе?

— Атамнан қорықтым, — деді анау мұрнын тартқыштап. — Тұнде терезені тықылдатып... дәтім бармады... Сосын биені мініп кеттім. Іздеп келер, сен келер деген ем... Ақылдасайық енді...

— Атамнан неге қорықтың, аға?

— Шалды білесің, аямайды.

— Неге?

— Ақымағым-ау... Мен... Мен сорлы қашып келіп отырған жоқпын ба?